

**Date – 24/06/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Kumin atangin MLA local area fund chu za zela 33 vela pungin MLA pakhat zelin cheng nuai 200 an hmang thei tawh dawn.**
- 2. Chief Minister Pu Lalduhoman Union Minister Animal Husbandry changtu George Kurian hnenah Mizorama ASF vawh pulhri tuartute chhawmdawlina neih a tul thu a thlen.**
- 3. Lok Sabha 18-na thutkhawm hmasa ber chu vawiinah tan a ni dawn.**
- 4. CBI chuan NEET-UG exam-ah zawhna putru chungchangah thubuai ziaklutin an chhui tan.**

<><><>

**MLA FUND**

Mizoram MLA-te'n an bial chhunga hmasawna hna an thawhna tur MLA local area fund chu kumin atang hian MLA pakhat zelin cheng nuai 200 an hmang thei tawh dawn.

Tun hnai a Planning and Programme Implementation department-in hriattirna a tihchhuahah chuan MLA tinin an bial hmasawna atana kumtina sum an hman theih cheng nuai 150 ni thin chu cheng nuai 50 a tipungin cheng nuai 200 a ni tawh dawn tih an tarlang a. A punna hi za zela 33 chuang a ni. MLA fund tihpun a nih avang hian Mizoram sorkar chuan kumtin cheng vaibelchhe 20 a sen belh dawn a. Kum hmasa lama kum tin cheng vaibelchhe 60 sen thin chu cheng vaibelchhe 80-in a pung dawn a ni. MLA fund tihpun tur chungchang hi kumin January ni 8-a legislative party tin aiawh telna General Purpose Committee (GPC)-in thutlukna an lo siam tawh zulzui a kalpui a ni a. Finance department-in an pawm hnu-ah Planning department hian hriattirna a chhuah ta a ni.

Kumin February ni 27 a kum 2024-25 budget a pharh paha a thusawi-ah khan Chief Minister Pu Lalduhoma chuan hei hi a sawi lang lo na chungin budget (Annual Financial Statement)-ah erawh tarlan a ni tawh a ni.

<><><>

**BIOMETRIC DATA**

Mizorama Myanmar raltlan 33,000 chuangte biometric data laksak turin Mizoram sorkar a inpeih.

Home department hotute sawi dan chuan Myanmar raltlante biometric enrollment kalpuina tur atan hian biometric enrollment portal pawh peih diam a ni tawh a. Sorkar laipui a Ministry of Home Affairs-in kalpui tura an tih hun hun a tipuitling thei turin Mizoram sorkar chu a inpeih tawh a ni. Myanmar

raltlante chanchin (biographic) data hi neih kim thawkhat a ni tawh a, lut leh chhuak an awm reng avangin tih kim vek hleih theih a ni lo. Chuti chung chuan an vai deuh thaw-in identity card pek an nih tawh thu home department hotute chuan an sawi a. District 11 a bawrhsap pisa tinin an district chhunga raltlante dinhmun hi an ngaihven reng niin an sawi bawk. Chief Minister Pu Lalduhoma chuan Prime Minister leh Union Home Minister thurawn angin biometric enrollment portal hi peih fel a ni tawh a. Myanmar raltlante chu an rama muanna tuan tling a awm hma chuan kir tir an nih dawn loh thu Union Home Minister Amit Shah hian a tiam niin Pu Lalduhoma chuan a sawi a ni.

Home department-in a chhinchhiah dan thar berah chuan tun dinhmunah Myanmar raltlan hi mi 33,835 an awm a. Siaha district a awm mi 91-te an ramah an kir leh emaw hmun danga an kal emaw avangin raltlan awm zat hi a tlem hret a ni. Raltlan zinga 10,141 hi mipa an ni a, hmeichhia 10,793 leh naupang 12,901 an awm bawk. Myanmar raltlan zinga mi 10,552 hi an puala siam raltlan buk 111-ah an awm mek a, mi 9,269 te erawh chu an chhungkhat laina leh thiante belin an awm a. In luah a awm an awm bawk a ni.

Myanmar raltlan hi Champhai district-ah tam berin mi 14,212 an awm a, Siaha district-ah 5,953 awmin Lawngtlai district-ah 5,922 an awm bawk a ni. Kum 2021 February ni 1-a mipui thlan sorkar thar ding mai tur Myanmar sipai-in thuneihna an hnehchhuh hnu March thla bul atang khan Mizoramah an rawn tlanche tan a. Sipai sorkar dodaltute laka sipaiho an inlulin luat avang leh tualchhung indo puan a nih tak avangin a hnu-ah tam tak an rawn luh belh ta zel a ni. MNF sorkar khan biometric data lak kha inthlan vuakvet chhuanlamin a ti duh lova, tunah hian kalpui theih turin ruahmanna siam a ni ta a ni.

<><><>

#### DISASTER FUND

Disaster Management and Rehabilitation Minister Pu K. Sapdanga chuan Mizoram Cyclone Remal tihchhiat thawm that na'n cheng vaibelchhe 237 leh nuai 6 senna tur ruahmanna duan a ni, a ti.

Inrinni chawhnu khan Aijal Club-ah Central Ministry hrang hrang aiawh, Inter-Ministerial Team leh Mizoram Sawrkar hnuai a kaihnawih department hrang hrang hotute an thukhawm a. Central leh State Sawrkar aiawh te hian Mizoram hmun hrang hranga Cyclone Remal avanga chhiatrupna thleng chungchang an sawiho. Pu K. Sapdanga chuan Central Team te lawmna thu leh Mizoram Cyclone Remal avanga chhiatna lian tham a tawh dan te, kawngpui, tuilakna, electric hruipui leh khawl chhia siamthat ngai te bakah tuilianin thlawhmma a tih chhiat dan te chiang takin a sawi a. Mizoram Cyclone Remal a tawrhna chu rin phak bakin a nasa a, central Team ten a hmun ngeiah an rawn endik thei chu lawmawm a tih thu a sawi a ni. Tuna chhiatrupna lo thlengah hian nunna hlu tak 34 lai chan a nih bakah thil tihchhiat a nei nasa em em a. Heng hmunhmma leh hmanraw chhiate siamthatna atan cheng tam tak sen a ngai dawn tih sawi a. SDRF leh NDRF rate angin mamawh te chhutchhuah a, ngenna siam a ni a ti.

DMR Minister chuan Chief Minister Pu Lalduhoma'n Union Home Minister Amit Shah hnenah hemi chungchangah hian Memorandum a theh lut tih a sawi bawk. Inkhawm hi Chief Secretary Dr Renu Sharma in a kaihruaia. He hunah hian DM&R, PWD, PHED, P&ED, Agriculture leh Horticulture

Department ten Power Point presentation an pekte an thlirho a. Power Point Presentation-ah hian Mizoram hmun hrang hranga chhiat rupna a lo thlen dan te leh siamthat hna thawhna tura mamawh zat te chiang takin an tarlang.

Aijal Club a inkhawm an tin hnu hian a huhovin Melthum, Hlimen, Kulikawn leh ITI vanga chhiatrupna thlenna hmunhma te a hmunah an endik nghal a ni.

<><><>

CM

Delhi-a cham mek Chief Minister Pu Lalduhoma chuan kar kalta khan Union Minister State for Fisheries, Animal Husbandry & Dairying, Minority Affairs, George Kurian chu a chennaah a tlawh.

African Swine Fever vawk pulhri-in Mizoram ran vulhtute harsatna a thlen nasat dan leh a tuartute chhawmdawlina neih a tul thu a thlen a. Union Minister hian Chief Minister hnenah hian "Rehabilitation Scheme' duang turin a rawn a, ASF vanga ranvulhtute harsatna sutkianpui a tum thu a lo hrilh niin sorkar thuchhuah chuan a tar lang a. Sangha tharchhuah lama Mizoram tihmasawn dan tur te pawh inpawh takin an sawi dun a ni.

Chief Minister hi Pu Jonathan Lalremruata, OSD to CM in a tawiawm a ni.

<><><>

ASF UPDATE

Niminah African Swine Fever (ASF) vei vawk 14 a thih belh leh avangin Mizoram puma he vawk pulhri leng avanga kumina vawk thi zat chu 3,200 a tling ta.

Animal Husbandry and Veterinary department hotute'n an sawi danin ASF vawk pulhri darh zel tur venna atan nimin khan vawk 76 tihlum a ni a. Kumina vawk pulhri darh tur venna atana vawk tihlum tawh zawng zawng hi 6,222 a tling tawh a. Tun dinhmunah hian ASF vawk pulhri hi veng/khaw 119-ah a leng mek a ni. Nimina vawk thite hi Khawzawl, Serchhip leh Kolasib district a thite a ni a. Nimina vawk suatte hi Serchhip leh Khawzawl district-a khaw 6 amite a ni a. Khawzawl district a Chalrang khua-ah vawk 55 tihlum a ni a, 'Chana Pawl' ti a hriat lar Chhuanthar kohhran mite awmkhawmna Serchhip district a Chhuanthar Tlangnuam khua-ah vawk 14 tihlum a ni bawk a ni.

<><><>

ADC/VC POLLS

June ni 27 (Ningani) a Lai Autonomous District Council hnuai Village Council inthlanpui leh Lawngtlai Chandmary MDC by-election vote thlak turah vote zawn beihpui ngawrh taka kalpui mek a ni.

Inthlanna buaipuitu tur lam pawhin thil tul pawimawhte a tahtawlin an bawhzui chho mek a. LADC hnuai-ah hian Village Council 99 a awm a. VC member mi 595 thlan chhuah tur a ni dawn a, chu'ng zingah chuan mitin chuh

theih seat 496 a awm bakah hmeichhe tana hauh seat 99 a awm bawk a ni. Candidate leh an mahni puitute'n intinah lutin beihpui an thlak ngawrh tawh hle.

Lawngtlai East assembly bial a thlan tlin a nih avanga Dr. Lorrain Lalpekliaana Chinzah in a chhuahsan tak Lawngtlai Chandmary MDC by-election neih tur a chuhtute chu BJP atangin Pu K. Lalawmpuia, MNF atangin Pu C. Lalsawmzuala, ZPM atangin Pu F. Hrangtukhuma te an ni a. Congress party chuan Candidate nei lo in MNF candidate Pu C. Lalsawmzuala an puih dawn thu an sawi.

State Election Commission hnuai inthlan vote thlak turah hian District Election Office lam chuan thil tul paiwmawhte an buaipui chho zel a, Inrinni khan By-election neihna a inthlanna buaipui turte tan Training buatsaih a ni a, Postal ballot hmanga vote thlakturte tan hun hawn tan a ni bawk.

<><><>

#### LOK SABHA

Lok Sabha 18-na thutkhawm hmasa ber chu vawiinah tan a ni dawn a. Tun thutkhawmah hian Lok Sabha inthlan zawh taka member thlan tharte chu rinawmna thu tiam tira lakluh an ni dawn a. BJP hruaitu Senior MP Bhartruhari Mahtab chu Protem Speaker a ni dawn a. Protem Speaker kaihhruaina hian member tharte hian rinawmna thutiam an la dawn a. Speaker thar hi tunkar Nilainiah neih a ni ang a. Ningani hian Presidetn Draupadi Murmu chuan house pahnih member thukhawm hmaah thu a sawi ang. Rajya Sabha pawh tunkar ningani ah an thukhawm dawn a. July ni 3 thleng a aw h ang.

<><><>

#### MANIPUR

Manipur-a Kuki-Zo hnam intelkhawmte chuan vawiin hian Churachandpur district a hmun hrang hrangah Union Territory ngaitin kawngzawh runpui an huaihawt dawn. Kawngzawhna hmunt urte hi Pherzawl, Kangpokpi, Tengnoupal, Chandel leh hmun dang engemawzatah ani a. Rorelna hnan neia Kuki-ZO hnamte Union Territory siam phutin mipuiten kawngzawh hi an nei dawn ani.

<><><>

#### UGC NET

CBI chuan UGC NET examination 2024-a dan kalha thiltih awm chungchangah thubuai a ziaklut. He thubuai hi thil tisualtua puh a hming tarlan loh lakah ziahlut niin section 120B, 420 IPC behchhanin thubuai hi ziahlut a ni a. Sawrkar laipua Department of Education Secretary atanga hekna an dawn bawhzuiin hetiang hian hma an la a. University Grant Commission (UGC) hnuai UGC Net-2024 exam buatsaih danah rintlak taka thil tih a ni lo nia hriat anih avangin complain hi thehluh a ni. UGC Net Exam hi National Testing Agency buatsaih niin tun thla ni 18 khan thawh hnihin exam hi buatsaih a ni.

<><><>